



AINI Ideris (lima dari kiri), Raduan Che Rose (enam dari kiri) dan Abdul Aziz Ishak (empat dari kanan) bersama panel Wacana Ilmuwan di UPM, Serdang, Selangor, semalam.

Tahap kesepaduan rakyat Malaysia capai 80 peratus

KUALA LUMPUR 13 Sept. – Tahap kesepaduan rakyat Malaysia kini mencapai 80 peratus manakala perpaduan pula masih di tahap sederhana.

Timbalan Pengerusi Majlis Profesor Negara, Prof. Ulung Datuk Dr. Shamsul Amri Baharuddin berkata, kesepaduan yang dimaksudkan adalah terdapat perkara yang dipersetuju bersama dalam bidang ekonomi, politik, budaya dan pendidikan.

Menurut beliau yang juga Pengarah Institut Kajian Etnik (Kita) Universiti Kebangsaan Malaysia, baki 20 peratus tahap kese-

paduan itu bagaimanapun perlu diusahakan lagi.

“Perpaduan belum mencapai tahap itu tetapi berlaku detik-detik perpaduan seperti dalam sukan, hiburan dan lain-lain lagi. Perpaduan mengambil masa.

“Dalam sukan, semua rakyat menyokong atlet-atlet yang bertanding tanpa mengira bangsa dan keturunan, ini yang dikatakan detik-detik perpaduan,” katanya kepada pemberita selepas menghadiri Wacana Ilmuwan Negaraku Malaysia: Di Mana Ke Mana Kita?

sempena Sambutan Hari Malaysia 2017 MPN di Universiti Putra Malaysia, Serdang dekat sini hari ini.

Shamsul Amri menambah, setiap tahun pihaknya memerlukan dana kira-kira RM1.5 juta untuk menjalankan penyelidikan sosial.

Katanya, kajian penting sebagai rujukan bagi mengekang perbalahan atau mengenal pasti masalah atau isu membabitkan etnik di negara ini.

Malah, beliau memberitahu, iklim sosial di Malaysia juga tidak boleh dijangka sebaliknya me-

merlukan penyelidikan yang menyediakan data-data terkini mengenai pola dan perubahan etnik.

“Kita perlu penyelidikan ini. Setakat ini, ada 200 pensyarah hubungan etnik di seluruh negara yang boleh membuat penyelidikan itu. Bukan hanya universiti kerajaan, banyak ahli akademik swasta juga boleh membantu.”

“Bagi saya peluang, bagi saya dana dan bagi saya tempoh dalam sekurang-kurangnya setahun untuk menjalankan penyelidikan itu,” ujarnya.